

Date – 20/05/2025

Time - 7:30 Hrs

HEADLINES (MORNING)

1. Social Welfare Minister Pi Lalrinpuiin Sethawn Jordan Center Kohhranin an enkawl thei em tih an zawt mek a, an enkawl theih loh chuan Sorkar in enkawl hna a chhonzawm dawn a ti.
2. Buichali leh Sairang inkar kawng chhe zual lai chu siamthat anih loh chuan bungraw phur truck an tlan ngam tawh dawn lo tih an lirthei neituten an sawi.
3. Union Agriculture Minister Shivraj Singh CHouhan-a Indus Water Treaty tihtawp chu Jammu and Kashmir, Rajasthan, Haryana, Punjab leh Himachal Pradesh-a loneitute tan hlawkna tam tak a pe dawn tih a sawi.
4. External Affairs Minister Dr.S.Jaishankar-a chuan Netherlands in Pahalgam firfiaka chetna a dem avangin lawmthu a sawi.

<><><>

HEALTH MINISTER

Social Welfare Minister Pi Lalrinpuiin ruihhlo ngai sim tawh te chher hriamna turin Sethawn Jordan Center Kohhranin an enkawl thei em tih an zawt mek a, an enkawl theih loh chuan Sorkar in enkawl hna a chhonzawm dawn a ti.

Nimina a pisaa chanchinbumite a kawmnaah he thu hi sawiin Minister chuan tunhnaia TBCC atanga ruihhlo ngai tam tak an tlanchhuah chungchanga sorkar demna hriat tur a awm thu a sawi a, he thil thleng chungchangah hian sorkar chuan hma la nghalin NGO leh kohhran hrang hrang hruaitute ko khawmin a bawhzui dan tur leh ruihhlo do kawnga hma an lak ho dan tur an sawiho a ti a. Sethawn chu Aftercare Skill Development Center atan kalpui tura ruahman mek a nih thu a sawi a. PCI leh BCM te biain, anni hian an kalpui theih loh chuan Sorkar in enkawl hna a chhonzawm dawn tih a sawi a ni.

Minister chuan Social Welfare Department-in a hriat theih chinah tun dinhmumnah hian Mizoram-ah Ruihhlo ngai enkawl na 46 a awm mek a ti a. Heng zingah hian Centre 11 chuan Ministry of Social Justice & Empowerment atangin Fund an dawng thin a ti a. District 5 (panga) Drugs De-addiction Center (DDAC) la awmlohna Saitual, Khawzawl, Hnahthial, Mamit leh Lawngtlai ah te DDAC dinna tur hi project proposal Ministry of Tribal Affairs ah thehluh mek a ni a ti.

PCI, BCM, ECM leh LIKBK ten an enkawl mek De-addiction Center te chu After Care Skill Development Course te nei tel nghal tura ngen an nih thu a sawi a. Rinna-a kal, Faith-based Centre ho chu Pathian kohna chhang leh Pathian rinchhana kal an nih angin Sorkar in mawhah an la lem lo tih sawiin hetihruah hian tanpuina an dil emaw, puihna an mamawh chuan an puih mai thin thu a sawi a ni.

Social Welfare Minister Pi Lalrinpuii'n Mizorama ruihhlo enkawl na hrang hrang chu Sawrkar hriatpuina Accreditation tih vek a ngai tawh dawn tih a sawi a ni.

Social Welfare Minister Pu Lalrinpuii hova Press Conference ah hian, tunhnaia TBCC atanga ruihhlo ngai tam tak an tlanchhuah hnua an chhuah hnua thi mi 6 an hriat tawh thu a sawi a, he thil thleng chungchangah hian sorkar chuan hma theihtawpin a la nghal tih a sawi a ni.

Sethawn Centre bik chungchangah hian Nikum June thlaa Chief Minister Pu Lalduhoma hova Council of Minister thukhawm chuan Jordan Center chu midang kuta hlan a thuphungin a remti a,

Social Welfare Minister Pi Lalrinpuii chuan sorkarin a enkawl zuina tur sum a neih loh avangin, he centre hi midang kuta hlan an rel tih a sawi a, Jordan centre hi nikum khan thla 3 chhung April, atanga June thla chhunga tihtawp lailawk a ni a, sorkar hmasa MNF sorkar chuan SEDP hmangin a lo kalpui tawh a, amaherawhchu ZPM sorkar hnua kalpui thei dinhmuna ding an intih tak loh avangin pawn lam mi in enkawlin ruihhlo enkawl dam hnua enkawl zuina aftercare leh skill development thlenga kalpui turin an duang a ni.

Hetihlai hian, Social Welfare Minister hlui Dr K Beichhua chuan nimin khan Aizawla BJP Office ah thusawiin Social Welfare Minister a nih laiin Sethawnah mi sangkhat len theihna tur, Biakin pahnih leh damdawi in bakah addiction atanga an talchhuah huna an tangkai pui tur Skill development Training Centre chu Thingdawl ah an din vek tawh a, hetah hian Trade hrang hrang zir theihna a awm dawn bawk a ni. Mahse heng te hi ZPM Sorkar chuan hmalak zuia hnehin tunah mimal enkawl thei tur a zawng a, a hmu thei bawk si lo a ni a ti a. Tun hnai TBCC-a thil thleng an hriat leh pheih chuan Sorkar chu inngahna tlak, thlamuanpui tlak niin a lang ta lo a ni a ti a. Sawhthing leh hmunphiah chingtute an thla a muang hek lo a. Sorkar tha ah chuan mipui an thla a muang thin a, Social Security pawh a tha thin a ni a ti bawk.

Pu Beichhua chuan, Chief Minister chuan an Sorkarn hma chuan UNO hriatpua ruihhlo ngaite enkawlna tur hmun lian ber pawl din a tum thu a sawi a, mahse vawiin thlenga ruihhlo ngaite tana hmalakna mumal a nei lo chu a vanduaithlak a ti a, tunah hian UNO hriatpui lem loh tal pawh a thalaite chhanchhuahna tur atana hma la turinka chah tih a sawi.

<><><>

NQAS

India rama sawrkar damdawi in tha bik tehnaah Mizoram chhunga damdawi in panga – State Referral Hospital, Falkawn leh PHC pali – Chhipphir PHC, Phuldungsei PHC, West Phaileng PHC, leh Bilkhawthlir PHC te an tel thar.

National Health Mission Mission Director Dr. Lily Chhakchhuak hnen atanga thudawn danin India rama sawrkar damdawi in tha bik tehna, National Quality Assurance Standards (NQAS)-ah State Referral Hospital, Falkawn (Aizawl West District Hospital / ZMC&H) chu an tling thar a, a tehnaah zaa 92.89 an hmu a. Hospital pumpui anga NQAS certification an hmuh bakah hian nau neihna hmun tha bik tehna (LaQshya)-ah Platinum Certificate hmuin Maternity OT bikah zaa 98.26 an hmu a, Labour Room-ah zaa 92.88 hmuin, naupang enkawlna hmun tha bik tehna, MusQan certificate pawh a hmu tel a, zaa 92.80 an score a ni.

Aizawl West District Hospital bakah hian Primary Health Centre zinga NQAS certificate hmu tharte point score dan chu – Chhipphir PHC (zaa 92.48), Phuldungsei PHC (zaa 91.27), West Phaileng PHC (zaa 89.47) leh Bilkhawthlir PHC (zaa 94.94) te a ni.

Heti hian Mizoram chhunga Sawrkar damdawi in 19 te chu NQAS national certificate nei tawh an ni a. Tunah hian sawrkar damdawi in 24 dangin state level certificate nei tawhin national certificate hi an dil mek bawk a ni.

Health Minister, Pi Lalrinpuii chuan, India rama damdawi in tha bik thlan chhuah zingah Mizorama damdawi in an awm belh zel chu Mizoram tan mellung pawimawh tak a nih thu leh damdawi in, district leh state-a thawktu zawng zawng te thawhrimna leh taimakna chhuanawm a tih thu a sawi a, he'ng tehna te hi Sawrkar damdawi in pantu damlote chu a chhawr tangkai bertu tur an nih thu a sawi a ni.

<><><>

TRUCKERS

Mizoram Truck Owners Association leh Mizoram Truck Drivers Association chuan thuchhuah siamin Buichali leh Sairang inkar kawng chhe zual lai chu tunkar Zirtawpni May ni 23 thlenga siamthat anih loh chuan bungraw phur truck an tlan ngam tawh dawn lo tih an sawi.

Mizoram Truck Owners Association General Secretary Pu Dina Tlau chuan Akashvani zawhna chhangin NHIDCL chan ni mek, Buichali leh Sairang inkar kawng chhe lutuk chungchang chu vawi duai lo thuneituteah an sawi tawh thu a sawi a, an harsatna chinfel a nih loh avangin tunkar chhung nghah ni se, hmalakna a awm loh chuan an tlan ngam dawn loh thu a sawi.

Mizoram Truck Owners Association (MTOA) leh Mizoram Truck Drivers Association (MTDA) hian kumin kumtir lam khan Vairengte leh Sairang inkar National Highway kawng chhia avangin anlo tlan lo tawh bawk a ni.

<><><>

KHAWZAWL ELECTROCUTION

Khawzawl District-a Chawngtlai khua naupang pahnih chu Pathianni tlai khan electric-in a man a, Khawzawl District Hospital-ah dah luh an ni. Ni 18, Pathianni tlai khan Chawngtlai naupang pathum chu Chawngtlai Presbyterian biakin chhak lawka khamah lawnin lung tohlawtah an awm a, an awmna lung tohlawt atang ban phak maia Tualte khaw eng pekna electric hrui chu an zinga pakhat Lalsangkima Pachuau Kum 9 mi chuan khawih palhin current-in a man a, a bula awm Lalnunsangi kum 11 mi chuan chhan tumin a vuan a, an awmna atang hian an tla ta a, an zing a tel ve Thlamuanpuia erawh vanneih thlak takin a him thung a ni, an mangang au thawm hi Pu Tlangthanmawia Chawngtlai Phaiveng chuan hriain a han bawihsawm nghal a, hmeichhe naupang zawk hi hun engemaw chen chu nikhaw hrelovin a awm a, vanneihthlak takin hun rei vak lovah a harh chhuak leh mai a. Hemi zan la la hian Khawzawl district Hospital panpui nghal an ni a, tunah hian damdawiinah enkawl mek niin ngaihtuahawm lutuk an ni lo a ni.

Kan corr sawi danin, Chawngtlai naupang chetsualna hmun hi tunhma lam atang tawha naupang len vahna thin a ni a, he lai khama lung tohlawt atanga khawih phak maiah hian Tualte khua eng pekna hruipui (electric line) kal phei hi nimin khan electric department hnathawktute leh khawtlang mitlawmngai ten an enfiah nghal a, mipui tana a him zawk theih dan tur enhovin a theih angin hma an la nghal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION AGRI

Union Agriculture Minister Shivraj Singh CHouhan-a Indus Water Treaty tihtawp chu Jammu and Kashmir, Rajasthan, Haryana, Punjab leh Himachal Pradesh-a loneitute tan hlawkna tam tak a pe dawn tih a sawi. Nimina New Delhi-a loneitute nen an inkawmnaah he thu hi sawiin Pu Chouhan-a chuan Indus lui tui hman danah awmze nei leh tangkai zawka hman dan tur ngaihtuah anih thu sawiin hei hian hun lo kal turah loneitute tan hlawkna a siam sak dawn tih a sawi a. Indus Water Treaty chawlh tir lailawk a ni chu thutlukna chhinchhiahtlak tak anih tu sawiin Pakistan hnena tui pekchhawn reng kha India rama loneitute tan a dik bik lo a ni a ti.

Union Agriculture Minister Shivraj Singh Chouhan chuan khawvel chaw bel ber ni turin India a inbuatsaih tih a sawi bawk a. Pu Chouhan-a chuan rampum huapin tun thla ni 29 hian Viksit Krishi Sankalp Abhiyan kalpui anih tur thu sawiin thlaleh June ni 12 thleng neih a ni ang a ti a. He beihpui thlak chhung hian ramchhung loneitute chu tunlai thiamna hman tangkai dan leh thlai chi thar hmang uar tura zirtir an ni ang a ti a. Ramchhunga district 723 huamchhunga loneitu vaibelchhe 1 leh nuai 5 chuangte hnen thleng phakin beihpui hi thlak a ni ang. Scientist team ten thingtlang khua sing 6 leh sang 5 tlawhin loneitute hnenah a takin zirtirna an pe dawn tih a sawi a ni. Pu Chouhana chuan agriculture chu ram eibar zawnnaa a hnukpui anih thu a sawi a. Ramchhung mipui zatve dawnte tan eizawnaa a siam thu leh ram eitur tharchhuaktu ber a ni a ti a. Prime Minister Narendra Modia kaihhruaina hnuaiah ram changkang ni tura beihpui thlak mek niin tuna Viksit Krishi pawh hian hei hi a tum ber a nih thu a sawi bawk a ni.

<><><>

EAM

External Affairs Minister Dr.S.Jaishankar-a chuan Netherlands in Pahalgam firfiaka chetna a dem avangin lawmthu a sawi. Nizan khan Dr.Jaishankar-a hian Netherlands Foreign Affairs Minister Casper Veldkamp chu The Hague ah kawmin ram pahnih inkara thawhdunna pawimawh tak takte a sawipui a. Netherlands-in firfiakte do kawngah zahngaihna nei hauh lova hmalak a duhna chu fakawm atih thu a sawi bawk ni.

Puan tawh angina External Affairs Minister Dr. S. Jaishankar chuan ram pathum Netherlands, Denmark leh Germany tlawh turin nimin khan a zinchhuak a. Union Ministry of External Affairs chuan thuchhuah siamin Dr.Jaishankara hi ni 6 a thang dawn a. A cham chhungin ram pathum hruiatute nen an inkawm dawn a. Idnia nena an thawhhona bakah khawvel thil thleng pawimawhte a sawipui dawn a ni. External Affairs Minister zin tur hi Europe ram thawhpuite nena thawhhona tih chak lehzuat tura hmalakna a ni a. Sumdawnna, investment leh thil pawimawh dangte a buaipui dawn a ni.

<><><>